

Այս հուշարձանները և հնագիտական իրերը դեռ չեն ենթարկվել գիտական մշակման, սակայն ընդհանուր տպավորությունն այն է, որ նրանք պատկանում են անդրկովկասյան կուլտուրական հին աշխարհի համար բնորոշ տիպին: Պետք է ընդգծել մի իրողություն, որ Զանգեզուրի վրա չեն տարածվել Վանի թագավորների նվաճողական արշավանքները և նրանց զորքերը չեն փոխադրվել Զանգեզուր-Ալանգյազ լեռնաշղթայից արևելք: Ոչ մի բևեռագիր արձանագրություն չի գտնված Զանգեզուրում, ինչպես և այն գետահովիտներում, որոնք բացվում են դեպի մերձարաքսյան դաշտավայրը Նախիջևանի շրջանից դեպի հարավ-արևելք: Վանի թագավորների արձանագրությունների մեջ չեն հիշատակվում այդտեղ ընկած երկրները: Մի այլ տեղում ես¹¹ փորձել եմ այս հանգամանքը բացատրել նրանով, որ Վանի թագավորների առաջխաղացման համար Մակուի շրջանից՝ պատմական Արտաշ գավառից, որտեղ նրանց ներկայության մասին անվիճելի ապացույցներ են տալիս այնտեղ նրանց թողած արձանագրությունները, դժվար հաղթելի արգելքներ էին դնում այն ընդարձակ ճահիճները, որոնք այն ժամանակ տարածված էին ոչ միայն այժմյան Զանգեբասարում և Սադարակի դաշտում, այլ ավելի լայն և երկար շերտով՝ Վաղարշապատի տակից սկսած Արաքսի ամբողջ ձախակողմյան փերով գրեթե մինչև Մեղրու կիրճը: Այդ ընդարձակ ճահիճների և նրանց վրա ճոխ եղեգնուտների մասին վկայություն են պահպանել մի քանի տարի առաջ Նախիջևանի Կարմիր վանքում (Ղըլըլ-վանքում) Ադրբեջանի գիտական ուժերի օգնությամբ կատարված պեղումների միջոցին գտնի միջից հանված մեծ կավե ամանի վրա գեղեցիկ պահպանված նկարները, որտեղ կարապներն ու եղեգնուտի մեջ ապրող վայրի էջը¹² պատկերված են զարմանալի կենդանի գծերով: Զանգեզուրում մեր գիտարշավների հավաքած պատահական իրերը, ինչպես և Ռեսլերի պեղումների ժամանակ գտնված իրերը չեն կրում խալդական (ուրարտական) կուլտուրայի ազդեցության հետքեր: Նրանց ուսումնասիրությունը կօժանդակի Զանգեզուր-Ալանգյազի լեռնաշղթայի արևմտյան գավառներում հայտնաբերված հնագիտական իրերի մեջ զանազանելու, թե՛

նրանցից որո՞նք են պատկանում այն ժամանակներին, երբ Վանա թագավորների զենքի հետ դեռ չէր մտել նաև խալդական կուլտուրան և տեղում իշխում էին հնուց կազմավորված ձևերը, Զանգեզուրում գտնվող ձևերին շատ մերձավոր և թե՛

որոնք են ավելի ուշ ժամանակների գործ:

Հնագիտական իրերը չեն անջատում Զանգեզուրի հին բնակչությունը անդրկովկասյան այլ ժողովուրդներից և ամենից ավելի մերձավոր աղբյուր են ցուցաբերում Ղարաբաղում՝ Առաջաձորում, Խոջալիում Ռեսլերի պեղած իրերի հետ: Զանգեզուրի տեղանունները թույլ են տալիս եզրակացնելու, որ Զանգեզուրումն էլ, ինչպես Լեռնային Ղարաբաղում՝ պատմական Արցախում, հին էթնիկ շերտը ազգակից է եղել Աղվանքի հին բնակիչներին: Այստեղ հանդիպում ենք՝

Բելս-ուտիբենն արև. Վաչագան՝ Աղվանքում և Արցախում սիրված հատուկ անուն՝ գյուղական անուններին: Բազմաթիվ վայրերի աղու և աղ արմատներով կազմված անուններին— Աղուեռձ, Աղուլի գյուղեր, Աղուանից՝ Հազարու գետ, Աղառեջ գավառ, Աղառի գյուղ...

¹¹ Տե՛ս իմ «Кошун-даш, мегалитическое городище в Сисиане (Зангезур), АН СССР. XLV, Сборник академику Н. Я. Марру», 1935, էջ 709:

¹² Онагр.